



*Jumat, 3 September 2021*

**Ogen: Ezekiel 13:1-16**



**Ukumen Man Kalak Perguak**



**P**iga-piga kali kubegi kalak ngerana nina " *erbual guna kiniulin labo salah*. Ngatakensa, banci erbual apaika niakap guna kiniulin. E maka piga-piga kalak rusur denga erbual ras labo akapna e sada kesalahen.

I bas renungenta wari enda Dibata erpenulak man nabi-nabi si perguak i tengah-tengah bangsa Israel. Nabi perguak e me; *si pemena*, si mahan-mahani nubuatan (ayat 2) si lit ikatakenna la lit, janah si la lit banci katakenna lit. Banci ka pe nambah-nambahi kai si lit, kedungenna si benar pe jadi salah janah si salah jadi benar nina. Umpamana galuh berita si man pesehenna, tapi sipesehna man kalak sideban kolak. *Si peduaken* Kai sibelaskenna e rikutken sura-sura ukurna (ayat 3). Kerina guna kepentingan peribadi entah kelompok. Emaka iupayakenna kalak si megiken rananna e banci tek arah kai sibelaskenna segelah seh sura-surana. Banci jadi arah ngatakan maka kerina sikap tapi situhuna labo sikap entah pe ikatakenna la sikap tapi situhuna sikap. Kerina sibagenda ikatakenna Tuhan la lit gunana janah maba kiniruntuhen. Tuhan ngelawan kalak perguak (ayat 8) janah Tuhan ngukumsa pe (ayat 9) sabap kerina si e mabai kalak sideban papak alu ngeruntuhen kegeluhenna ras kai si ibangunna.

Senina moria "*setiap kebohongan akan melahirkan kebohongan yang lain sehingga kebohongan itu akan beranak cucu*", si enda penting janah arus tetap si jadikan prinsip geluh. Emaka kita selaku moria la arus erbual. Pang nuriken kerna situhu, bas jabu, bas ingan erdahin, bas Gereja ras masyarakat. Turikenlah kata tuhu alu cara si tenteng. Megermetlah nandangi ajaran kalak perguak gelah ula sempat kita kena sidingna. Terlebih i bas erkiniteken masa pandemi, melala tawaren gelah kita la setia man Tuhan. Senjatanta e me gelem ras tetap ngeluh i bas Kata Dibata.